



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

**Komunikadu Imprensa**  
**10 Agostu 2018**  
**Parlamentu Nasionál**

**JSMP apresia ho insiátiva Komisaun F Parlamentu Nasionál ne'ebé fornese espasu ba  
sosiedade sivíl sira atu kontribui iha prosesu lejislativu**

Iha 08 Agostu 2018, Komisaun F Parlamentu Nasionál (PN) hala'o audénsia pública ho sociedade sivíl hodi rona pápel, vizaun, misaun no perspetiva sociedade sivíl relaciona ho knaar Komisaun F ne'ebé responsavel ba asuntu edukasaun, saúde, seguransa sosiál no igualdade jéneru.

Depoide hato'o apresiasaun ba Komisaun F Parlamentu Nasionál (PN), ba oportunidade no konsiderasaun atu envolve sociedade sivíl, JSMP hahú introdús pépel servisu JSMP nian iha área monitorizasaun ba tribunál no Parlamentu Nasionál inklui deskobrementu no susesu sira ne'ebé JSMP antije oinsa bele halo influencia ba hasae qualidade no konfiansa públiku ba setór justisa.

“JSMP apresia inisiativa Komisaun F no konsidera audénsia ida-ne'e hanesan pasu pozitivu ida iha inísiu Komisaun F nian iha V lejislatura atu fó-espasu hodi envolve partisipasaun sociedade sivíl sira atu kontribui ba prosesu lejislativu sira iha área relevante sira ne'ebé tutela ba Komisaun F. Espera katak ida-ne'e la'os formalidade deit maibé iha nia kontinuasaun no husu atu rona no konsidera kestaun sira ne'ebé sociedade sivíl propoin,” dehan Diretór Ezekutivu JSMP, Luis de Oliveira Sampaio.

Iha audénsia ne'e mós JSMP hetan pergunta rua husi deputadu sira kona-ba progresu ba julgamentu kazu krime grave sira no JSMP nia hanoin kona-ba oinsa atu hakotu impase política relaciona ho kestaun nomeasaun lista pendente sira ba membru VIII governu konstitusionál.

Hatan ba pergunta rua ne'e Diretór JSMP haktuir katak kestaun kona-ba nomesaun membru governu ne'e ketaun política no atu hakotu kestaun ne'e polítiku sira tenki tuur hamutuk atu iha konsensu. Opsaun seluk, bainhira dalan dialogu no aprosimsaun hirak-ne'e mak labele resolve, JSMP rekomenda atu lori prosesu ne'e ba Supremu Tribunál Justisa atu decide. Tanba só tribunál deit mak iha kompetensia tomak atu decide no iha kbiit aas liu autóridade sira seluk.

Kona-ba prosesu kazu krime grave sira JSMP haktuir katak nia prosesu iha autór prinsipal barak to'o agora livré no balun halo ona prosesu. Maské depoide prosesu balun halai lakon no balun kumpri nia sentensa maibé ema hirak ne'ebé tribunál prosesu no kondena ne'e bele konta ho liman. Arguidu barak mák oras ne'e livre hela iha Indonezia no ita la iha mekanizmu atu lori sira mai hatan iha Timor-Leste. Liuliu tanba políticamente estadu la fó priodade ba kazu krime grave sira iha pasadu no fó importansia liuba relasaun diplomatiku entre nasaun rua.

Aleinde ne'e, atualmente tribunál la bele julga kazu krime grave sira iha pasadu tanba tuir artigu 10.3 Regulamentu UNTAET), Nú. 11/2000, no artigu 22 Regulamentu UNTAET Nú. 15/2000

kona-ba kompozisaun painel ba kazu krime grave define katak kompozisaun painel ba julgamentu kazu krime grave tenki envolve juis internasionál nain rua no nasional nain ida. Entertantu agora dadaun la iha juis internasionál tanba ne'e tribunál sira labele halo prosesu no julga kazu krime grave sira ne'e. JSMP rekomenda atu deputadu sira altera lei ne'e atu fó kompetensia ba juis timoroan sira hodi halo prosesu ba kazu sira ne'e iha futuru.

JSMP observa katak deputadu sira hosi Komisaun F antusiasmu tebes atu rona hanoin sira husi sosiedade sivíl. Deputadu sira konsidera ideia sira ne'e importante tebes no sira husu atu sosiedade sivíl bele iha kolaborasaun diak iha futuru atu monitoriza atividade governu nian hodi hadia buat ne'ebé diak no hatutan buat ne'ebe diak ona atu lori nasaun ne'e sai diak liután iha fututu.

Iha enseramentu Prezidénti Komisaun F, Sra. Maria Goru Mali Barreto subliña katak nia parte nakloke no Komisaun F sei kontinua atu rona sosiedade sivíl sira nia hanoin no preukupasaun sira hodi bele fó solusaun diak ba resolve prolema ne'ebé povu infrenta.

Iha ikus, JSMP husu disponibilidade ba Komisaun F, atu iha futuru bele rona informasaun detalla husi JSMP ho membru grupu advokasia ba asuntu inestu atu apresenta no diskuti hanoin sira kona-ba altersaun ba Kódigu Penál hodi tau artigu espesifiku kona-ba krime inestu.

Organizasaun Sosiedade Sivíl ne'ebé partrisipa iha audénsia Komisaun F nian kompostu husi ONG 12 mak hanesan JSMP, AIFeLa, Pradet, FGG, Orfonato Santa Bakita, Rede Feto, Fakupers, Casa Vida, Movimento Feto Foin Sae, Caucus, Ba Futuru no Alola Foundation.

Atu hetan informasaun kle'an liu tan favor kontaktu:

Luis de Oliveira Sampaio  
Diretór Ezekutivu JSMP  
Telefone: 3323883  
[www.jsmp.tl](http://www.jsmp.tl)